

IZGRADNJA I REKONSTRUKCIJA OBJEKATA ZAJEDNIČKOG STANOVANJA

U okviru Programa „Rekonstrukcija i obnova individualnih stambenih objekata i objekata zajedničkog stanovanja“, Federalno ministarstvo raseljenih osoba i izbjeglica u 2010. godini je finansiralo i sufinansiralo niz projekata izgradnje, rekonstrukcije i sanacije objekata zajedničkog stanovanja. Izgradnja, rekonstrukcija i sanacija obuhvata stambene zgrade porušene ili devastirane u toku ratnih dejstava. Njihovom izgradnjom i sanacijom bit će omogućen povratak i stanovanje prijeratnim korisnicima stanova u njima.

OPĆINA ŽEPČE

U saradnji i na zahtjev općine Žepče, Federalno ministarstvo raseljenih osoba i izbjeglica je finansiralo izgradnju I faze stambene zgrade u Prvoj ulici u Žepču. Naime, u toku rata porušeni su stambeni objekti u kojima se stanovalo, a usljed promjene regulacionog plana njihova izgradnja i obnova nije moguća pa su prijeratni korisnici ostali bez mogućnosti povratka i adekvatnog stambenog zbrinjavanja. Općina Žepče je obezbijedila lokaciju, potrebne saglasnosti i finansirala temelje stambene zgrade, a Ministarstvo sa 130.000,00 KM finansiralo je radove i materijal, te je urađena I faza, stavljanje objekta pod krov. Potpunom izgradnjom ove zgrade osigurat će se 10 stambenih jedinica namijenjenih raseljenim osobama i izbjeglicama koji su ostali bez svojih stanova usljed rušenja u toku ratnih dejstava.



Prostor za izgradnju stambene zgrade u Žepču i bivše barake



Stambena zgrada u Žepču - I faza

OPĆINA DRVAR

Iz Programa podrške povratku Srba na prostore Federacije Bosne i Hercegovine, finansirana je rekonstrukcija i sanacija stambene zgrade u Drvaru. Stambena zgrada je devastirana u toku ratnih dejstava i nije bila uslovna za povratak raseljenih osoba, prijeratnih korisnika. Njenom rekonstrukcijom i sanacijom omogućen je povratak i stambeno zbrinjavanje 8 raseljenih porodica. Sanacija je koštala oko 130.000,00 KM, a u potpunosti je finansirana od strane Federalnog ministarstva raseljenih osoba i izbjeglica . Prijeratnim korisnicima su predati ključevi stanova i time će uslijediti njihov povratak.



Prije rekonstrukcije i sanacije



Sanirana zgrada u Drvaru

OPĆINA ZENICA

U skladu sa Programom utroška sredstava „Transfer za raseljena lica i povratnike“ utvrđenih Budžetom Federacije Bosne i Hercegovine za 2010. godinu i Planom povratka, obnove, gradnje i razvoja održivog povratka za 2010. godinu, Federalno ministarstvo raseljenih osoba i izbjeglica sufinansiralo je izgradnju stambene zgrade u naselju Kanal u Zenici.

Naime, od posljedica aviobombardovanja 1992. godine srušeni su stambeni objekti, Kasina, u naselju Kanal u Zenici, te je 30 porodica ostalo stambeno nezbrinuto i interno raseljeno.

Na inicijativu Udruženja građana „Kanal 92“ Zenica, a u cilju rješavanja pitanja ovih raseljenih lica, Općina Zenica, Ministarstvo za rad, socijalna pitanja i izbjeglice Zeničko-dobojskog kantona i Federalno ministarstvo raseljenih osoba i izbjeglica udruženim sredstvima sufinansiraju izgradnju stambene zgrade sa 30 stambenih jedinica namijenjenih isključivo raseljenim licima, prijeratnim korisnicima stanova u porušanim objektima.

Ukupna investicija iznosi oko 1.200.000,00 KM, a Federalno ministarstvo raseljenih osoba i izbjeglica učestvuje sa 375.000,00 KM.

Završetkom ove zgrade osigurano je trajno zbrinjavanje 30 raseljenih porodica i stvoreni su uslovi za siguran i stabilan povratak na područje Zenice.



Stambena zgrada u izgradnji - Zenica